



ILIDŽA

INFORMATIVNI BILTEN OPĆINE ILIDŽA

Ilidža • Decembar 2017

• Broj 166





REDOVNA SJEDNICA OPĆINSKOG VIJEĆA

Budžet Općine Ilidža 25.900.000 KM

Općinsko vijeće Ilidža na 11. redovnoj sjednici, održanoj 27. decembra 2017. godine usvojilo je Budžet Općine Ilidža za 2018. godinu u iznosu od 25.900.000 KM. Najviše sredstava planirano je za kapitalne projekte 7.630.000 KM, za udruženja građana 500.000 KM, za kulturu 395.000 KM, za sport 300.000 KM, za obrazovanje, nauku i mlade 469.000 KM, za zdravstvo 100.000 KM, za socijalne pomoći pojedincima 350.000 KM i za vjerske objekte 300.000 KM. Vijeće je donijelo i Odluku o izvršenju budžeta Općine Ilidža za 2018. godinu kojom se uređuje struktura prihoda i primitaka, rashoda i izdataka budžeta, njegovo izvršavanje, prioriteti plaćanja i finansijsko izvještavanje.

Prijedlozi akata o regulisanju imovinsko- pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Čamdžija Keme i Duraković Senaida. Usvojeni su i prijedlozi rješenja o rješavanju imovinsko-pravnih odnosa u svrhu legalizacije poslovnih objekata po zahtjevima „Hecoprom“ d.o.o. Sarajevo i Pejčević Behije, te prijedloge rješenja o utvrđivanju prava vlasništva na zemljištu u korist Dedić Nafije, Džomba Rizaha, „Hecoprom“ d.o.o. Sarajevo, Idrizović Muharema, Papić Ragipa, Prevljak Huse i Radičević Zrinke.

Program rada Općinskog vijeća za 2018. godinu

Prijedlog Programa rada Općinskog vijeća Ilidža za 2018. godinu bila je jedna od tačaka dnevnog reda 11. redovne sjednice. Programom su utvrđeni zadaci Općinskog vijeća, odnosno prijedlozi akata koje će Vijeće razmatrati u toku 2018. godine, a koji proizilaze iz zakona, utvrđene politike i ekonomskog razvoja Općine, kao i druga pitanja iz samoupravnog djelokruga, nosioci pripreme materijala i rokovi za razmatranje.

U 2018. godine neke od tačaka o kojima će raspravljati Vijeće bit će: Prijedlog Odluke o raspisivanju javnog poziva za predlaganje kandidata za dodjelu priznanja, Prijedlog Odluke o usvajanju RP Pejton, Nacrt odluke o usvajanju urbanističkog projekta Spomenički kompleks Tunel D-B, Prijedlog Odluke o usvajanju RP Blažuj, Strategija prema mladima na području općine Ilidža sa akcionim planom 2018-2021. godina.

Analiza stanja komunalne čistoće, Izvještaj o izvršenju Budžeta za šest mjeseci, Program održavanja, zaštite, rekonstrukcije lokalnih i nekategorisanih cesta za 2018. bit će također tačke dnevnog reda sjednica u 2018. godini.



Informacija o problemima pasa luralica na području općine Ilidža

Ne postoji zakon koji tačno prepoznaje pse luralice nego je donesen Zakon o zaštiti i dobrobiti životinja kojim je uređena odgovornost ljudi za zaštitu i dobrobit životinja u pogledu držanja, smještaja i ishrane, zaštite od mučenja, zaštite životinja u vrijeme ubijanja i klanja, te odnos prema napuštenim životinjama, rečeno je u Informaciji o problemima pasa luralica koje je Vijeće primilo k znanju. Važno je napomenuti iz Zakona o zaštiti i dobrobiti životinja, a to je da se eutanazija može izvršiti sam ako se životinja ne može izliječiti, dostigla visoku starost i otkazuju joj životne funkcije, boluje od neizlječive bolesti, opasna za okolinu i ako je životinja u agoniji.

Općina Ilidža ima mogućnost da osniva skloništa za životinja što automatizmom stvara obavezu da pronalazi rješenja u rješavanju problema napuštenih životinja, a posebno pasa luralica. Općina je pokrenula aktivnost konkretnog rješavanja problema pasa luralica, te je sa Zemljoradničkom zadrugom oformila sklonište za pse u Gladnom polju.

Sklonište ne može svojim kapacitetom prihvatiti sve napuštene životinje, ali je evidentno da je manji broj pasa luralica na ulicama. Da bi se što kvalitetnije riješili problem pasa luralica sa područja općine Ilidža predlaže se da je potrebno napraviti bazu podataka o svim vlasnicima, izvršiti mikročipiranje svih vlasničkih pasa, te rigorozne kazne za vlasnike koji svoje ljubimce ostave na ulicama.

U azilu bi trebalo izvršiti pregled zdravstvenog stanja kliničkim i specijalističkim pregledima da bi se utvrdile zarazne bolesti i neizlječive bolesti, pojačati kampanju za udomljavanje životinja kroz sredstva informisanja NVO, eventualno građevinski proširiti kapacitet azila u slučaju potrebe. Ove mjere bi trebalo provoditi udruženo sa Veterinarskim stanicama na području Kantona Sarajevo i kafilerijom, te bi na taj način smanjili njihovu populaciju.



REDOVNA SJEDNICA OPĆINSKOG VIJEĆA

Informacija o stanju i aktivnostima u oblasti rada sa mladima, sporta i kulture na području općine Ilidža

Programom rada Općinskog vijeća za 2017. godinu planirana je Informacija o stanju i aktivnostima u oblasti rada sa mladima, sporta i kulture na području općine Ilidža.

Kreiranje i razvoj omladinske politike Općine Ilidža temelji se na Zakonu o mladima Federacije Bosne i Hercegovine te preporukama relevantnih evropskih dokumenata (Evropska povelja Vijeća Evrope o učešću mladih u životu lokalne zajednice, Bijela knjiga Evropske komisije, 11 indikatora omladinske politike Savjeta Evrope i Evropskog omladinskog foruma) i Rezolucije o mladima u BiH koji obuhvataju 12 osnovnih elemenata omladinske politike. Općina Ilidža, u saradnji sa Institutom za razvoj mladih KULT, realizovala je projekt obnove i izgradnje objekta koji se nalazi u Banjskoj 2 i koristi se u svrhu obrazovno-razvodnog centra za mlade. Ovim projektom želio se sačuvati objekat koji ima kulturno-historijski značaj i ponuditi mladima mjesto na kojem mogu realizirati svoje aktivnosti.

Budžetom Općine Ilidža za 2017. godinu planirana je posebna budžetska linija namijenjena mladima-Budžet za mlade, kao posebna budžetska stavka postoji od 2006. godine koja u 2017. godini iznosi 174.000,00 KM. Od školske 2001/2002. godine redovno se dodjeljuju stipendije učenicima srednjih škola i studentima visokoškolskih ustanova. Općina Ilidža je u školskoj 2016/17. godini dodijelila 365 stipendija talentovanim učenicima i studentima, 39 stipendija za djecu bez oba roditelja i roditeljskog staranja koji se nalaze na redovnom školovanju i 162 stipendije za učenike i studente slabijeg imovinskog stanja. Kad su u pitanju mladi realizirani su razni projekti: (su)finansiranje projekata za mlade na osnovu javnog poziva, kao podrška drugim aktivnostima i projektima za mlade, rad mobilnog tima za podršku reformi obrazovanja u dijelu inkluzivne nastave, organizacija kurseva za neformalno obrazovanje i usavršavanje mladih, škola prijateljstva-interaktivne aktivnosti za djecu, organizacija kampanja/obilježavanje bitnih datuma u polju reproduktivnog zdravlja, distribucija edukativnog i promotivnog materijala, interaktivno predavanje za mlade na temu izbora, izbornih procesa i političkog uređenja Bosne i Hercegovine i još mnogi projekti.

U cilju poboljšanja stanja u oblastima koje obrađuje ova informacija, predložene su sljedeće mjere: dosljedna provedba odredbi Zakona o mladima FBiH, izdvajanje većih sredstava za podršku projektima iz oblasti kulture, sporta i mladih, poboljšanje infrastrukture u postojećim objektima za realizaciju kulturno-umjetničkih sadržaja, a u u cilju zadovoljavanja lokalnih potreba stanovništva u oblasti kulture i izdvajanje finansijskih sredstava za realizaciju projekata vezanih za rekonstrukciju, restauraciju ili konzervaciju objekata kulturno-historijskog naslijeđa koji bi se implementirali putem nadležne službe zaštite Kantonalnog zavoda za zaštitu kulturno-historijskog i prirodnog naslijeđa Sarajeva.

Usvojen Akcioni plan za realizaciju Strategije razvoja općine Ilidža za 2018. godinu

Vijeće je usvojilo Akcioni plan za realizaciju Strategije razvoja Općine Ilidža za 2018. godinu koji sadrži aktivnosti u cilju implementacije strateških razvojnih opredjeljenja Općine Ilidža definiranih u dokumentu Strategija razvoja Općine Ilidža za period 2014-2020, te kao osnova za implementaciju EU i IPA donatorskih programa. Akcioni plan sadrži listu prioritetnih projekata čija realizacija počinje u prvoj godini provedbe strategije, elemente važne za planiranje i praćenje njihove implementacije, te plan organizacijskih i ljudskih kapaciteta potrebnih za uspješnu realizaciju strategije. Plan omogućava pravilno planiranje troškova i izvora finansiranja planiranih projekata i njihovo pravovremeno uključivanje u općinski budžet, ali i druge izvore finansiranja na koje se računa tokom provedbe.

Stipendije za djecu slabijeg imovnog stanja i djecu bez oba roditelja i djecu bez roditeljskog staranja

Općinsko vijeće je donijelo Odluku o stipendiranju učenika i studenata slabijeg imovnog stanja u školskoj/akademskoj 2017/2018. godini u ukupnom iznosu od 147.250 KM. Odlukom će se stipendirati ukupno 183 učenika i studenata, od toga 135 učenika i 48 studenata. Mjesečni iznos stipendije za učenike je 75 KM, a za studente 100 KM. Stipendije će dobijati 10 mjeseci.

Vijeće je na sjednici donijelo i Odluku o stipendiranju djece bez oba roditelja i djece bez roditeljskog staranja u školskoj/akademskoj 2017/2018. godini u ukupnom iznosu od 40.500 KM. Stipendirat će se 42 djece, od toga devet studenata, 10 učenika srednjih i 23 učenika osnovnih škola. Učenicima srednjih i osnovnih škola mjesečni iznos stipendije je 75 KM, a studentima 100 KM.

Mišljenje na Godišnji plan gospodarenja privatnim šumama za 2018. godinu na području općine Ilidža

Na osnovu Zakona o šumama Kantona Sarajevo i Statuta Općine Ilidža u okviru tačke Davanje mišljenja na Godišnji plan gospodarenja privatnim šumama za 2018. godinu na području općine Ilidža, a na prijedlog Komisije za budžet, privredu, finansije i ekonomska pitanja Vijeće je donijelo zaključak kojim Općinsko vijeće Ilidža ne može dati traženo mišljenje sa stručnim obrazloženjem na Godišnji plan gospodarenja privatnim šumama za 2018. godinu na području općine Ilidža kako je to propisano važećim kantonalnim Zakonom o šumama jer Općina nema stručni kadar predviđen članom 9 koji bi mogao dati takvo mišljenje, te predlaže da se pristupi izmjenama i dopunama člana 9 Zakona o šumama Kantona Sarajevo.



Uručeni ugovori o stipendiranju 209 učenika i 164 studenta

Općinsko vijeće Ilidža na prijedlog Općinskog načelnika donijelo je Odluku o stipendiranju 373 talentovanih učenika i studenata u školskoj/akademskoj 2017/2018. godini u ukupnom iznosu od 344.460 KM. Odlukom će se stipendirati 164 učenika srednjih škola i 209 studenata. Mjesečni iznos stipendije za učenike i studente prve godine je 78 KM, a za studente od druge do šeste godine kreće se u rasponu od 96 do 120 KM zavisno od postignutog rezultata u predhodnoj godini. Stipendije će se isplaćivati deset mjeseci. Sredstva dodijeljena stipendijom se ne vraćaju.

Načelnik Općine Ilidža prof. dr. Senaid Memić, 18. decembra 2017. godine u sali Općine Ilidža upriličio je prijem i podjelu ugovore o stipendiranju za talentovane učenike i studenata.

„Stipendiranje talentovanih učenika i studenata je investiranje u našu budućnost i dodjela ugovora o stipendiranju



mi je najdraža obaveza jer ste vi naš ponos. Ova država i društvo vas trebaju i očekuju od vas da preuzmete vođenje ove države u bolju budućnost. Vaša jedina obaveza je da nastavite da učite i ove skromne pare utrošite korisno. Želim vam puno sreće u vašem daljnjem školovanju“, kazao je u svom obraćanju učenicima i studentima načelnik Memić.



Novogodišnji prijem za direktore osnovnih i srednjih škola

Načelnik Općine Ilidža prof. dr. Senaid Memić 26. decembra 2017. godine upriličio je tradicionalni novogodišnji prijem za direktore osnovnih i srednjih škola sa područja općine na kojem se razgovaralo o dosadašnjoj i budućoj saradnji Općine i škola, te potrebama i problemima i kako ih prevazići. Da je ovogodišnja saradnja bila izuzetno uspješna govori i činjenica da je Općina za škole u ovoj godini izdvojila 1.300.000 KM na čemu su direktori škola izrazili svoje zadovoljstvo i zahvalnost. Načelnik je obećao da će Općina i u narednoj godini pomagati školama u poboljšanju uslova za rad.

„Hvala vam na svemu što činite za našu djecu i drago mi je da ste zadovoljni saradnjom. I u narednoj godini ćemo nastaviti pomagati škole u stvaranju boljih uslova za našu djecu, a u planu je i početak izgradnje osnovne škole na Stupu“, kazao je načelnik Memić.

Načelnik Memić organizirao prijem za 32 volontera

Načelnik Općine Ilidža prof. dr. Senaid Memić 29. decembra organizovao je prijem za 32 volontera primljenih na osnovu provedenog Javnog oglasa, a koji će biti raspoređeni u općinskim službama na godinu dana bez zasnivanja radnog odnosa, a u cilju sticanja radnog iskustva.

Nakon sticanja radnog iskustva, volonteri će biti u mogućnost polagati stručne ispite, te aplicirati na konkurse, kako u državnoj službi, tako i drugim institucijama i firmama. Općina je angažovala volontere sa visokom stručnom spremom čiji angažman počinje od 1. januara 2018. godine.

„U Općini Ilidža želimo da što više naučite. Nakon okončanja ćete dobiti potvrdu o završetku volontiranja čime ste stekli uvjete za apliciranje za posao. Želim Vam sreću i ugodno jednogodišnje iskustvo“ rekao je načelnik Memić.





Zahvalnica načelniku Memiću od Džematskog odbora Ilidža-Centar

Džematski odbor Ilidža Centar uručio je načelniku Općine Ilidža prof. dr. Senaidu Memiću zahvalnicu Islamske zajednice BiH za pomoć u gradnji centralne džamije Ilidža. Dodijeljene su zahvalnice i privrednicima koji su novčano pomogli. Zahvaljujući donacijama ovaj objekat je stavljen na raspolaganje vjernicima.

Prijem za najuspješnije ilidžanske sportiste

Načelnik Općine Ilidža prof. dr. Senaid Memić 29. decembra 2017. godine upriličio je prijem za sportiste koji su ostvarili značajne rezultate na domaćim i međunarodnim takmičenjima u 2017. godini i tom prilikom pored čestitki uručio im je i novčane nagrade.

„Čast mi je i zadovoljstvo biti danas sa vama. Imati djecu koja se takmiče, imati djecu koja će sutra biti uzorni građani je ponos. Biti najbolji je teško, ali je i obaveza. Vrijednost nije u primjima i nagradama, vrijednost je u osjećaju koji vi imate. Budućnost bez vas bila bi upitna. Imate pravo da budete agresivniji i da zahtjevate više u odnosu na druge, a mi vas nećemo pustiti, jer vi ste naš ponos i želim vam još puno uspjeha u narednom periodu“; kazao je načelnik Memić.

Novčane nagrade za potignute rezultate dobile su ekipe RK „Hrasnica“, ŽOK „Igman“, KK „Champion“, te pojedinci Ismet Godinjak, Ilma Rahmanović, Adem Fetahović, Edin Sinanović, Meris Muhović, Anes Čongo, Džemal Bošnjak, Faris Ljajić, Faris Svraka, Sadin Hadžajlija, Edin Sarić, Mila Petrović, Ermin Galić, Ajdin Vatrić, Eldin Hajdarpasić, Nejla Mešević, Ajdin Zukić, Medin Žiga, Dua Ahmed i Harun Ormanović.



Prijem za učenike čiji radovi krase kalendar Općine Ilidža

I ove kao i predhodnih godina Općina Ilidža je za štampanje kalendara za 2018. godinu kao likovno rješenje koristila najuspješnije likovne radove sa motivima Ilidže učenika osnovnih i srednjih škola sa područja općine.

Tim povodom, 28. decembra 2017. godine u Općini Ilidža upriličena je prezentacija općinskog kalendar za 2018. godinu i prijem za učenike osnovnih i srednjih škola, autore najljepših likovnih radova, kao i njihove nastavnike likovnog odgoja.

Načelnik Općine Ilidža prof. dr. Senaid Memić čestitao je učenicima čiji radovi se nalaze na kalendaru i njihovim nastavnicima, te im tom prilikom uručio diplome i prigodne novčane nagrade.



„Vi koji ste nagrađeni treba da se ponosite i sad i u budućnosti i svako treba da radi ono što voli. Zapamtite da samo rad donosi vrijednosti i u sve što ste uložili svoj trud jednog dana će vam se pozitivno vratiti. Nadam se da će vas ove skromne nagrade motivisati za dalji rad i trud koji je ovom prilikom prepoznat. Želim vam puno sreće i uspjeha u životu“ kazao je načelnik Memić.

Nagrađeni učenici, autori likovnih radova su: Šejla Šabanović, Azer Babajić, Melisa Kucalović, Adem Džihović, Hena Kapidžić, Rijad Alihodžić, Samra Kuć, Ammar Omerika, Berina Karić, Anur Kapo, Almina Lisić i Kenan Bećirević.



Općina Ilidža u borbi protiv korupcije

Suprotstavljanje korupciji jedan je od najvećih izazova javne uprave, a nastoji se spriječiti kroz primjenu preventivnih i represivnih mjera. S obzirom na izraženiju društvenu svijest i opredjeljenost za učinkovitiju i angažiraniju borbu protiv korupcije, međunarodnu obavezu BiH na ovom planu i standardima koje bi zemlja trebala ispuniti na putu evropskih integracija su dokumenti Akcionog plana za provedbu strategije u borbi protiv korupcije. Upravo, na osnovu ovih dokumenata Općina Ilidža je pristupila izradi antikorupcijskih mjera na lokalnom nivou. Odlukom općinskog načelnika formirana je Radna grupa za izradu Akcionog plana za borbu protiv korupcije za period 2018 – 2020. godine u Jedinstvenom općinskom organu uprave Općine Ilidža.

Izrada akcionog plana ima višestruki značaj, jer se na ovaj način pruža mogućnost za pokretanje dijaloga sa svim akterima u lokalnoj zajednici, kako bi se pronašla odgovarajuća rješenja za prevenciju korupcije. Uspostavljanjem antikorupativnog sistema podrazumijeva kvalitetniji pristup građana informacijama o radu, ograničavanje diskrecijskih ovlaštenja, unaprijeđenje određenih administrativnih procedura, povećanje komunikacija unutar službi, te poboljšanje efikasnosti u radu općine.

Proces izrade akcionog plana podrazumijeva i aktivno učestvovanje općinske administracije u utvrđivanju efikasnosti dosadašnje primjene antikorupcijskih inicijativa, utvrđivanja oblasti naročito osjetljivih na pojavu korupcije. Akcionim planom bit će definisane konkretne mjere i aktivnosti neophodnih za realizaciju strateških ciljeva.

Tim povodom 13. decembra je održan sastanak Radne grupe, na kojem su se čula mišljenja i podaci neophodni za definisanje antikorupcijskih mjera, kao i konkretne mjere za unaprijeđenje postojeće situacije, a u cilju poboljšanja suradnje sa građanima i drugim institucijama. Članovi Radne grupe su dizajnirali i usaglasili anketni upitnik o samoprocjeni uposlenika Općine Ilidža o antikorupcijskim inicijativama i transparentnostima njenog rada, uradili analizu ankete, a definisani su strateški ciljevi za borbu protiv korupcije i mjere koje treba poduzeti za unaprijeđenje postojećeg stanja sa nosiocima aktivnosti i vremenskim rokovima za realizaciju.



Komisije Vijeća usvojile metodologiju za realizaciju Gender akcionog plana Općine Ilidža

Vijeće je na desetoj redovnoj sjednici usvojilo Gender akcioni plan Općine Ilidža za period 2017-2020. godine. To je strateško-planski dokument Općine koji direktno podržava primjenu Zakona o ravnopravnosti spolova BiH na lokalnom nivou i definira ciljeve i mjere za unapređenje ravnopravnosti spolova u lokalnoj zajednici, te potiče budući rast i razvoj općine. Akcioni plan obuhvata četvorogodišnji period i koncipiran je na osnovu realnih finansijski mogućnosti za njegovu implementaciju. Za implementaciju ovog dokumenta zadužene su Komisija za izbor, imenovanje i pitanja ravnopravnosti spolova i Komisija za zaštitu ljudskih prava, predstavke i prijedloge u saradnji sa javnim institucijama, nevladinim organizacijama, lokalnim partnerima, savjetima mjesnih zajednica, političkim partijama i ostalim subjektima i pojedincima koji svojim zakonskim i drugim ovlaštenjima mogu doprinijeti implementaciji planiranih aktivnosti.

Tim povodom 12. decembra 2017. godine održana je peta zajednička sjednica ove dvije komisije na kojoj je usvojena metodologija za realizaciju Gender akcionog plana Općine Ilidža i podjela odgovornosti i zaduženja u 2018. godini, te usaglasili način daljeg rada kroz timsku podjelu zaduženja. Za provođenje aktivnosti predviđene ciljevima GAP-a u 2018. godinu formirane su tri radne grupe. Za realizaciju cilja „Podsticanje rodno odgovornog poduzetništva u Općini Ilidža“ odgovorna je prva grupa u čijem sastavu su Azra Jahić, Samir Šišić, Faik Hadrović i Faruk Muharemović, za cilj „Povećati uključenost građana/ki u suzbijanje i sprečavanje rodno motivisanog nasilja“ odgovorna je druga grupa i njeni članovi Hamida Memišević, Amila Gadžo, Amel Pintol i Emna Čolak, te za realizaciju cilja „Podizanje svijesti o značaju zaštite zdravlja za ukupan kvalitet života“ odgovorne su Smiljana Viteškić i Alma Vatrić, članovi treće grupe.

Sve tri grupe su obavezne dostaviti svoje planove aktivnosti do kraja januara 2018. godine.

Sanacija krovova u mjesnim zajednicama Hrasnica I i II

U ilidžanskim mjesnim zajednicama Hrasnica I i Hrasnica II u toku su radovi na sanaciji četiri krova zgrada kolektivnog stanovanja a u okviru projekta utopljanja stambenih objekata. Sanacijom je predviđena demontaža postojećih krovova, sanacija oštećenih greda, postavljanje novih letvi i pokrova, te pokrivanje novim crijepom. Saniraju se krovovi zgrada u ulicama Put Famosa broj 18, Izeta Musića 11, Čamila Marića 1,3,5 i ulici 15. maj broj 5 i 7. Vrijednost radova je 114.929 KM a finansiraju ih Ministarstvo prostornog uređenja, građenja i zaštite okoliša Kantona Sarajevo sa 70.000 KM i Općina Ilidža sa 44.929 KM. Izvođač radova je Famos Gradnja d.d, a rok za završetak radova je dva mjeseca u zavisnosti od vremenskih prilika.



Vijećnici Općinskog vijeća Ilidža prisustvovali sjednici Gradske skupštine Grada Beča

U sklopu studijske posjete Beču, koja je dio Programa koji provodi Forum lijeve inicijative u saradnji sa OLOF PALME INTERNATIONAL CENTRE-om, vijećnici u Općinskom vijeću Ilidža, Samir Avdić i Mirza Alijagić 15. decembra 2017. godine prisustvovali su na prijemu kod Renate Brauner, bivše zamjenice gradonačelnika a danas pomoćnice gradonačelnika zadužene za finansije, ekonomiju i međunarodne poslove grada Beča, nakon čega su prisustvovali zasjedanju Gradske skupštine grada Beča. Uz prisustvo diplomatskog kora, čelnih ljudi grada Beča i velikog broja ljudi iz Bosne i Hercegovine koji trenutno žive u Austriji, naši vijećnici su prisustvovali na koncertu Bosnian Clasic Guitars, nakon čega je predstavljena i izložba o Sarajevskoj vijećnici u Muzeju vojske.

Za zimsko održavanje cesta zaduženo pet firmi

Za zimsko održavanje cesta na području općine Ilidža zaduženo je pet i firmi i to konzorcij Twi d.o.o. i Almy Transport d.o.o., konzorcij Braća Mujić d.o.o i HP Investing d.o.o., firma Sarajevoputevi d.d, JP "Ilidža", te Mevludin commerc d.o.o. Konzorcij Twi d.o.o. i Almy Transport d.o.o. čiste u MZ Rakovica, MZ Blažuj i MZ Osjek. Konzorcij Braća Mujić d.o.o i HP Investing d.o.o. zadužene su za ulice u MZ Hrasnica I, Hrasnica II, Sokolović- Kolonija, Lužani, Vreoca, Vrelo Bosne. Sarajevoputevi d.d čiste MZ: Ilidža Centar, Otes, Stup, Stup II, Stupsko brdo, Butmir, te Donji Kotorac. JP "Ilidža" održava pješačke staze i platoe. Ulice naselja Šerifići, Zoranovići i Jasen održava Mevludin commerc d.o.



Općina Ilidža i dalje lider po broju dolazaka i ostvarenih noćenja turista

Prema podacima Zavoda za informatiku i statistiku Kantona Sarajevo za period januar-novembar 2017. godine, Općina Ilidža je ostala lider u Kantonu Sarajevo po broju dolazaka i ostvarenih noćenja turista, broju smještajnih jedinica i ležaja. Kanton Sarajevo je za prvih 11 mjeseci 2017. godine posjetilo 454.029 turista, koji su ostvarili 915.095 noćenja, a broj registriranih dolazaka na Ilidžu u istom periodu je 162.889 turista, koji su ostvarili 303.640 noćenja, te je već premašen bilans ostvaren u 2016. godini. Na području općine Ilidža registrovano je 27 smještajnih objekata (23 hotela, po jedno hotelsko naselje-auto kamp, motel, hostel i ženski studentski dom) sa 1.810 smještajnih jedinica i 4.054 ležaja. Ilidžanski hoteli su opremljeni i drugim sadržajima: kongresnim dvoranama, SPA centrima, restoranskim mjestima, ljetnim baštama, svećanim salonima, otvorenim i zatvorenim bazenima, sportskim salama i drugim pratećim sadržajima, čime je obogaćena turistička infrastruktura. Uz sve navedeno, na području općine Ilidža registrovana su i 203 ugostiteljska objekta koja također upotpunjavaju turističku ponudu. Općina Ilidža kontinuirano sprovodi aktivnosti na kvalitetu ukupne turističke ponude (infrastrukturalna ulaganja, izrada strateške i planske dokumentacije, poboljšanje komunalnih uslova, postavljanje turističke signalizacije i informativnih panoa na najfrekventnijim mjestima, sufinansiranje projekata koji podržavaju razvoj turizma i zaštite okoliša, te podrška kulturnim i sportskim manifestacijama), a privatni sektor kroz ulaganja u povećanje smještajnih kapaciteta, te dogradnju i rekonstrukciju postojećih ugostiteljsko-turističkih sadržaja. Ovaj rezultat je produkt konstantne sinergije lokalne zajednice i privatnog sektora, koja u konačnici vodi povećanju turističkih kapaciteta, obogaćenju turističke supstrukture i proširenju spektara ponude turističkog proizvoda naše općine. Neizostavno, treba napomenuti da turističkoj ponudi doprinose lokaliteti Spomenika prirode "Vrelo Bosne" i Spomeničkog kompleksa „Tunel D-B“ koji su u žiži interesovanja kako stranih, tako i domaćih turista.

Uklonjeni ruševni objekti opasni po okolinu

Urbanističko-građevinska inspekcija Općine Ilidža uklonila je dva rušena, devastirana objekta koji prema procjenama predstavljaju opasnost po živote građana, okolne objekte i saobraćaj. Radi se o preventivnim mjerama a srušeni su objekti „Restoran Topola“ na Ilidži i „Stara škola“ u Hrasnici. Novim Zakonom o prostornom uređenju Kantona Sarajevo urbanističko-građevinskim inspekcijama je omogućena ovakva intervencija, što do sada nije bilo moguće. Novim Zakonom je urbanističko-građevinskim inspektorima dato pravo i dužnost da rješenjem narede investitoru ili vlasniku građevine da o svom trošku izvrše uklanjanje objekta ako utvrde da zbog dotrajalosti predstavlja opasnost po život ili zdravlje ljudi, okoline i saobraćaj. Ukoliko je vlasnik nepoznat ili odsutan, organizaciju i troškove rušenja preuzima Općina. Vlasnici takvih objekata nemaju pravo naknade štete, a općinski organ ima obavezu da naplati troškove nastale rušenjem od vlasnika.



Volontiranje je cool okupilo 800 mladih ljudi

Razvoj svijesti o društvenoj važnosti volontiranja počinje od najmlađih dana, a škola je na tom putu jedan od ključnih elemenata. Prepoznajući značaj školskog volontiranja Centar za razvoj omladinskog aktivizma CROA od 2011. implementira projekat „Volontiranje je cool!“. Projekat ima za cilj da osigura bolje korištenje potencijala kojeg volontiranje ima u rješavanju problema lokalnih zajednica, te da volontiranje promovira kao pozitivan, privlačan i društveno koristan način života mladih.

U Hotelu Hills 5. decembra 2017. održana je „Galerija volonterizma“ u kojoj su učestvovala četiri osnovne škole sa područja općine Ilidža, a ukupno 47 škola iz različitih krajeva BiH.

Ovi mladi ljudi, njih 800 angažovani su bili više od 100 hiljada volonterskih sati.

Galeriju je otvorio načelnik Općine Ilidža prof. dr. Senaid Memić, koji je istakao da se volontiranjem jača svijest mladih u našoj zemlji za učestvovanjem u razvoju lokalne zajednice, ali i poboljšanjem njihovog statusa u cjelini.

„Volontiranje treba shvatiti kao dugoročno ulaganje u sebe, svoju budućnost, ali i razvoj lokalne zajednice“ zaključio je načelnik Memić.

Promocija pjesme „Vrelo Bosne“

U sali Doma kulture - Hrasnica 19. decembra 2017. godine održana je promocija pjesme „Vrelo Bosne“, čiji je cilj promovisanje dječijeg stvaralaštva i prirodnih ljepota Općine Ilidža. Autor teksta je Taida Terzo, a autor muzike je Senad Bostandžić. Aranžman su radili Senad Bostandžić i Halid Hajduković. Pjesmu izvodi dječiji hor „Hrasnički pupoljci.“ Ovaj projekat je Općina Ilidža finansijski podržala, a nastojat će se da pomenuti hor nastavi sa radom pri JUKSR Hrasnica - Ilidža.



“Skype in the Classroom”

Učenici „Prve osnovne škole“ na časovima engleskog jezika, kao i na časovima sekcije „Skype Club“ imaju mogućnost vježbati komunikaciju na engleskom jeziku sa učenicima iz drugih škola širom svijeta. Žana Žerajić, nastavnica engleskog jezika, kao član Microsoft zajednice za obrazovanje (Microsoft Educator Community) u mogućnosti je povezati se sa edukatorima širom svijeta. Jedan od načina saradnje je Mystery Skype, igra pogađanja lokacija sudionika Skype-a. Učenici trebaju pogoditi lokaciju druge škole koristeći DA/NE pitanja, atlase, mape i sl.

“Svi učenici su bili vrlo aktivni i zainteresovani te nisu krili oduševljenje novim iskustvom. Skype in the Classroom omogućava učenicima komunikaciju sa vršnjacima iz cijelog svijeta, omogućava im da posjete mjesta o kojima su mogli samo čitati u knjigama i nauče kako da budu globalni građani i da razumiju širu sliku o sebi u svijetu”, rekla nam je Žana Žerajić.

Kao član portala edukatora Microsoft in Education, nastavnica Žana Žerajić omogućila je učenicima da se povežu sa čuvarom nacionalnog parka u Americi, Mount Rainier National Park i Yellowstone National Park. Učenici su imali kratko predavanje o nacionalnim parkovima putem Skype-a, a potom je slijedilo postavljanje pitanja od strane učenika. U avgustu 2017. godine postala je MIE expert (Microsoft Innovative Educator Expert) i trenutno je jedina nastavnica u BiH koja je i Microsoft Skype Master Teacher.

Osma osnovna škola “Amer Ćenanović” proslavila svoj dan

Učenici Osme osnovne škole “Amer Ćenanović” 22. decembra 2017. godine proslavili su 17. godina rada ove ustanove. Učenici koji pohađaju ovu školu za sve prisutne izveli su prigodan kulturno-umjetnički program. Obilježavanju godišnjice prisustvovao je resorni ministar Elvir Kazazović kao i predstavnici Općine. Direktor škole Vahid Ćustović tokom manifestacije osvrnuo se na rad i uspjeh učenika te poželio učenicima puno dobrih ocjena kao i radosti u ovoj školi.





Komedija "Macaglu" na Ilidži

Bosanskohercegovački glumac velikan Dragan Marinković Maca 18. decembra 2017. nasmijao je posjetioce Multimedijalne sale nekadašnjeg kina Igman u svojoj cabare stand-up komediji "Macaglu".

Maca već godinama uspijeva svojim nenadmašnim smislom za humor kroz pozorišne i televizijske uloge nasmijati publiku i unijeti živost u našu svakodnevnicu. U vremenu kada živimo brzo i radimo puno, ljudi su željni šale i komike, te je stand-up komedija najbolja antistres terapija.

Mjesec engleskog jezika

U saradnji sa Udruženjem English Club u Osmoj osnovnoj školi "Amer Čenanović" u decembru se provodio projekat Mjesec engleskog jezika-English Language Month. Nastavnici škole sa gostima Native Speakerima rade na osnaživanju djece u vještinama govora i pisanja engleskog jezika. Najbolji kreativci učestvuju na besplatnim časovima engleskog jezika koji se u ovoj školi održava srijedom poslije nastave.



Humanitarna izložba ručnih radova


Udruženje „Zlatna ruka“ Ilidža u holu zgrade Općine Ilidža 11. i 12. decembra 2017. godine organizovalo je izložbu ručnih radova. Vrijedne aktivistice ovog udruženja izložile su ručno tkate bosanske serdžade, ćilime, vez, kožnu galanteriju, pletene odjevne predmete, heklane garniture i slike rađene u aluminskoj foliji. Izložba je prodajnog karaktera, a prihod od prodaje namjenjen je za božićne i novogodišnje paketiće djeci bez roditelja.

Doneseno Betlehemske svjetlo na Ilidžu

Članovi Odreda izviđača „Vrelo Bosne“-Ilidža 22. decembra, 2017. godine, kao i svake godine, pa tako i ove, u sarajevskoj katedrali, preuzeli su svjetlo mira, „Betlehemske svjetlo“ i donijeli ga na područje naše općine.

Tom prilikom, izviđači odreda, u ranim jutarnjim satima, donijeli su ga u Stupsku crkvu "Uznesenja Blažene Djevice Marije", gdje su srdačno dočekani i tom prilikom pročitali pismo-čestitku, povodom nastupajućih blagdana.

Nakon toga „Betlehemske svjetlo“, preneseno je i Samostan Karmelički, takođe na Stupu, gdje su srdačno dočekani i sa njima uz kafu, sok i kolače, lijepo proveli vrijeme i nakon čega su se i upisali u knjigu posjeta.





Trodnevna edukacija u organizaciji "Bašlije"

U organizaciji UTIKUS "Bašlija" u periodu od 12. -14. decembra 2017. završena je trodnevna edukacija koja je sprovedena kroz četiri projekta i to: Međunarodni naučni simpozij unapređenja rada prosvjetnih radnika i obrazovnih institucija KS, (re)kreativne radionice za mlade „Pružamo vam ruku“, jačanje lokalne samouprave, uvod u školu novinarstva - Ilidžanski omladinski časopis „Zmaj“.

Ove edukacije imale su za cilj da podstaknu, poboljšaju i pomognu rad prosvjetnih radnika i obrazovnih ustanova Kantona Sarajevo. Pored prosvjetnih radnika u projektima su učestvovali i mladi srednjoškolski, roditelji, te učenici osnovnih škola.

Ovi projekti bili su realizirani u saradnji sa Udruženjem "OPTIMUS" pod pokroviteljstvom Općine Ilidža i Ministarstva za obrazovanje, nauku i mlade Kantona Sarajevo.

Pobjednik božićnog malonogometnog turnira ekipa Unisa

Na terenu hotela Delminijum u Dugludima 16. i 17. decembra 2017. godine, u organizaciji NK Sašk 1910 Napredak, a u povodu katoličkog blagdana Božića, održan je 10. tradicionalni božićni turnir u malom nogometu za djecu rođenu 2008. godine. Na turniru je učestvovalo 16 ekipa. Prvo mjesto osvojila je ekipa Unisa, drugo Škola fudbala Dar i treće ekipa Famos Fair Playa. Za najboljeg igrača turnira proglašen je Bakir Bajić iz Famos Fair Playa, najbolji strijelac je Adi Hadžić iz Škole fudbala Dar, dok je najbolji golman Muhamed Omerović iz Unisa. Pobjedničkim ekipama i pojedincima dodijeljeni su pehari i medalje i diplome, a uručio ih je načelnik Općine Ilidža, prof. dr. Senaid Memić koji je tom prilikom kazao: „Pobjednik je onaj koji se ne ljuti što nije pobijedio. Nastavite i dalje da se takmičite i družite i nastojte da budete bolji od nas starijih“. Općina Ilidža je i ove godine kao i predhodnih finansijski podržala turnir.



“Hvala još jednom načelniku Općine Ilidža prof. dr. Senaidu Memiću, Službi za obrazovanje, kulturu, sport i informisanje, ministru Elviru Kazazoviću i svim drugim donatorima, predavačima i učesnicima projekta na podršci koja nam je puno značila”, kazao nam je Džemal Hurić, vođa i idejni tvorac projekata.



Održana radionica o jačanju kapaciteta NVO u lokalnoj zajednici

U organizaciji Udruženja mladih „Bez Ograničenja“ (NoLimit) u prostorijama udruženja u Maloj aleji na Ilidži održana je trening radionica na temu „Jačanje kapaciteta nevladinih organizacija (NVO) u lokalnoj zajednici na kojoj su učestvovali predstavnice pet udruženja sa područja općine Ilidža. Učesnicima radionice prezentovan je način pisanja projekata po evropskim standardima i apliciranje na EU grantove koji su dostupni Bosni i Hercegovini, njihovim benefitima i svrsi čemu služe. Takođe su se upoznali sa obrascima za javni poziv prekogranične saradnje, te mogućnostima pronalaženja partnera za realizaciju projekata. Radionicu je finansijski podržala Općina Ilidža putem javog poziva za sufinansiranje projekata za mlade.

Najbolji volonter Amer Ibrahimović

Povodom Međunarodnog dana volontera u hotelu Hollywood je održana manifestacija na kojoj su istaknutim volonterima dodijeljena priznanja za dugogodišnji rad i doprinos. Priznanje je dobio i volonter Crvenog križa općine Ilidža Amer Ibrahimović, za nesebičan volonterski rad i iskazanu humanost i dobrovoljnost, te značaj u radu s mladima.





Podijeljeni paketići u organizaciji Crvenog križa

U toku decembra Mladi Crvenog križa općine Ilidža su pokrenuli akciju za pripremu novogodišnjih paketića. Građani su donosili svoje priloge u prostorije CK Ilidža. Pripremljeni paketići su podijeljeni djeci iz porodica slabijeg imovnog stanja na prigodnoj manifestaciji 27. decembra 2017. godine. Djeca su imala priliku da se druže sa njihovim volonterima i Djeda Mrazom, te da uživaju u kratkoj priredbi.



Djeca zaposlenika Općine i boračkih udruženja podijeljeni paketići

Za djecu zaposlenika Općine Ilidža i boračkih udruženja za područja ove općine 28. decembra 2017. upriličena je svečana podjela novogodišnjih paketića. Mališani su s radošću dočekali Djeda Mraza, a u međuvremenu ih je zabavljao Mirsad Abdagić - Kike. Podijeljeno je 89 paketića.



U organizaciji Zlatne ruke podijeljeno 47 paketića

U organizaciji Udruženja Zlatna ruka podijeljeno je 47 božićnih i novogodišnjih paketića. "Osmjeh je bio naša nagrada i dobili smo ga i zbog toga smo sretni" rekla nam je Zlatija Dizdarević, predsjednica Udruženja.



RVI podijelili 100 paketića

Ratni vojni invalidi Općine Ilidža 28. decembra 2017. godine organizovali su podjelu novogodišnjih paketića za 100 djece, svojih pripadnika.

Predsjednik Udruženja Esad Delić Dela rekao je da su djeca uzrasta do 10 godina dobila paketiće, a obezbijeđeni su sredstvima od članarine. On je izrazio nadu da su su paketići obradovali mališane.

Rukometašice Hrasnice jesenji prvaci



Ženski rukometni klub „Hrasnica“ jesenji dio prvenstva u Prvoj ligi Federacije Bosne i Hercegovine završio je osvajanjem prvog mjesta. Mlada ekipa rukometašica predvođena trenerom Fuadom Lokvančićem na najboljem je putu da izbori plasman u najelitnije takmičenje za rukometašice, Premijer ligu Bosne i Hercegovine. Ako se uzme u obzir da je ekipa sastavljena od djevojaka koje su ponikle u ovom klubu i da najstarije igralice imaju tek 18 godina, postignuti rezultat ima još veći značaj. Poslije kratke pauze za vrijeme božićnih i novogodišnjih blagdana ekipa će nastaviti sa treninzima punim intezitetom kako bi što spremnije dočekali proljetni dio prvenstva i zadržali prvo mjesto koje ih vodi u Premijer ligu BiH. Titulu jesenjeg prvaka izborile su Melina Telarević, Merima Karišik, Almedina Mehović, Amina Bećirbašić, Elma Mehović, Ena Hasibović, Milana Močević, Šejla Čardaković, Marija Šehovac, Adna Šurković, Dalila Helja, Samra Ramić, Samra Mulić, Melisa Omerović i Ema Hasibović-Galijašević sa treneima Fuadom Lokvančićem i Davorom Ljiljanićem.